

## Shifā

**Injeel : Mattā 8:5-17**

Īsā<sup>(a.s)</sup> Kafarnahum naam ek shahar me gae. Wahaan unke paas ek Romī afsar āyā aur unse madad kī bheekh maaṅgne lagā. <sup>(5)</sup> Us afsar ne kahā, “Maalik, merā naukar bahut beemaar hai. Wo itnī zyaadā takleef me hai ki apne bistar se hil bhī naheen saktā.” <sup>(6)</sup>

Īsā<sup>(a.s)</sup> ne afsar se kahā, “Maiñ usko shifā dene chaltā huñ.” <sup>(7)</sup>

Us afsar ne jawaab diyā, “Maalik, maiñ is laayaq naheen ki āp mere ghar chaleñ. Āpko sirf yaheen se hukm dene kī zarurat hai, aur merā naukar theek ho jaaegā. <sup>(8)</sup> Maiñ ye islie jaantā huñ, kyuñki maiñ hukm ko samajhtā huñ. Kuch log haiñ jo mere upar hukumat karte haiñ aur kuch sipaahī merī hukumat me bhī haiñ. Maiñ kisī sipaahī se agar kahuñ, ‘Jaao,’ to wo chalā jaatā hai. Maiñ agar kisī dusre sipaahī se kahuñ, ‘Āo,’ to wo ā jaatā hai. Maiñ apne naukar se kahtā huñ, ‘Ye karo,’ aur merā naukar mere hukm par amal kartā hai. <sup>(9)</sup>

Jab Īsā<sup>(a.s)</sup> ne ye sab sunā, to wo hairaan ho gae. Unhone apne saath maujud logoñ se kahā, “Sacchaāi ye hai ki is ādmī ke jaisā aqeedā maine ab tak kaheen naheen dekhā, yahaan tak ki Yahudī logoñ me bhī naheen.” <sup>(10)</sup>

[Īsā<sup>(a.s)</sup> ne apne saath baiṭhe logoñ se kahā,] “Bahut saare log mashriq aur maḡrib se āenge. Ye log Allaah taa’alā kī saltanat me Ibraaheem<sup>(a.s)</sup>, Ishaq<sup>(a.s)</sup> aur Yaaqub<sup>(a.s)</sup> ke saath baiṭheñge aur khaanā khaaenge. <sup>(11)</sup> Aur jin logoñ ko Allaah taa’alā kī saltanat me honā chaahie thā unko baahar nikaal diyā jaaegā. Unko baahar nikaal kar aṅdhere me pheñk diyā jaaegā jahaan log cheekheñge aur dard aur sadme se daant pees kar roeñge.” <sup>(12)</sup>

Tab Īsā<sup>(a.s)</sup> ne afsar se kahā, “Apne ghar jaao. Tumhaare naukar ko usī tarah shifā milegī ki jaise tumne sochā thā.” Aur uske naukar ko usī waqt shifā mil gaī. <sup>(13)</sup>

Tab Īsā<sup>(a.s)</sup> apne shaagird ke ghar gae jiskā naam Patras thā. Unhone dekhā ki Patras kī saas bahut tez buḡhaar me bistar par letī huī haiñ. <sup>(14)</sup> Īsā<sup>(a.s)</sup> ne unke haath ko chuā aur buḡhaar fauran utar gayā. Wo fauran uṭh khaḍī hueñ aur Īsā<sup>(a.s)</sup> kī kḥidmat me lag gaeñ. <sup>(15)</sup>

Us shaam bahut se logoñ ko Īsā<sup>(a.s)</sup> ke paas laayā gayā. Unmeñ se bahut saare logoñ par gandī ruhoñ kā qabzā thā. Īsā<sup>(a.s)</sup> kī āwaaz sun kar gandī ruheñ un logoñ se utar gaeñ. Unhone beemaaron kā ilaaj kiyā. <sup>(16)</sup> Unhone wo sab aṅjaam diyā jiskī peshangoī Yashaayaah<sup>(a.s)</sup> ne karī thī. [Bahut zamaanoñ pahale] Yashaayaah<sup>(a.s)</sup> ne Maseehā ke baare me kahā thā:

“Wo hamaarī mushkiloñ ko apne upar le legā aur hamaare dard ko hamaare liye sahegā.” <sup>[a](17)</sup>

---

[a] Taurait : Yashaayaah 53:4